

## Wam Juãw Juãw kot Jejus kôt hkwýjê hwýr kagà nê mẽnh

Juãw na pre kagàja nhípêx. Na pre kagà hkwý nhípêx rax nê. Na pre mãânêñ Juãw kot tanhmã Jejus kot amnhĩ nhípêx to ho pa ã kagà nê Apokarip nê Sikũn Juãw nê Hapuhã Juãw nhũm pre ja piitã Tĩrtũm nhỹ hã hã kagà.

Juãwja Jejus nhỹ hã hkrajê jahkre ho mẽ pa xwýnhjê hõ na pre. Nê kêp Xiakre htõ na pre. Tã ra hpigêt tỳx nê kagàja nhípêx. Uràk nê mẽ kot Tĩrtũm kôt amnhĩ xunhwýr xwýnhjê mã hipêx. Mẽ kot kamã harênh nê mar nê kãm axpên kĩnh o pa kaxyw. Nê mẽ kot amnhĩ tomnuj ã amnhĩ pumunh kôt tanhmã amnhĩ nhípêx to hã mẽ kãm karõ nê hã kagà. ã na pre Juãw mẽ kãm mẽmoj jarênh nê hã kagà anê nê mẽ hwýr kumê. Nê mẽ kãm:

*Jejus kêp Tĩrtũm kapêr o amnhĩrit xwýnh ã harênh  
Juãw 1.1-4; Eprêw 1.1-4*

<sup>1</sup> Pa ixpyrà nê mẽ ate Jejus kôt amnhĩ xunhwýr xwýnhjaja? Xà mẽ amex? E ot pa mẽ amã kagàja nhípêx nê mẽ awýr kumê. Ixte mẽ amã Tĩrtũm kapêr o amnhĩrit xwýnh jarênh kaxyw. Amnepê mã kormã mẽmoj amrakati ri nhũm pre ra rãhã ri pa ho pa. ãm kukwak ri pix mã na pu htem Tĩrtũm mẽ wa kuri pahtĩr tũm nê papa ho papa mã xwýnh. Tã ý hã mẽ ixte kapêr o mẽ ajahkre ho ri mẽ ixpa xwýnhjaja na pa prem ixpiitã kormã

akupỹm kaxkwa hwỳr àpir kêt ri inhno ho omunh o ri hkôt ixpa. Nē mẽ ijamak o kapēr mar o ri hkôt ixpa. Nē mẽ inhĩkra ho hkupênh o ri hkôt ixpa. <sup>2</sup>Na pre kaxkwa kamã Hipêêxà hkôt ri pa ho pa htã amnē pika hwỳr mẽ pahwỳr wrỳ. Hãmri nē jar mẽ pakamã kato pa pre mẽ ixkwỳjaja omu. Tã mẽ ixte omunh xà hkôt na pa htem amnhĩ xô ri tanhmã mẽ amã harēnh to. Kojã nhỹrmã akupỹm mẽ pahto mẽ pahtĩr pu mẽ kuri pahtĩr tũm nē pamex nē papa ho papa. <sup>3</sup>Na pa prem tanhmã kapēr to hã mar o ri hkôt ixpa. Nē kot tanhmã mẽ kãm amnhĩ nhĩpêx to hã omunh o ri hkôt ixpa. Ta kagàja kamã amnhĩ xô ri ixprĩ hã mẽ amã harē nē hã kagà. Mē ate ixpyrà nē aprĩ hã kot tanhmã amnhĩ nhĩpêx to ho pa hã harēnh mar kaxyw. Jao mẽ pahpiitã te ixkre tipxi kamã mẽ papa pyrãk o amnhĩ nhĩpêx o papa nē axpên kôt pajamaxpēr o ri papa. Jao Mēpanhĩpêêxà Maati mẽ Kra Jesus Kris wa hkôt amnhĩ nhĩpêx mex o ri papa. <sup>4</sup>Tã pa mẽ amã kagàja nhĩpêx nē mẽ awỳr kumē. Mē ate kamã harēnh nē mar hãmri nē mẽ ixpyrà nē ajamakêtkati nē akĩnh nē ri apa kaxyw.

*Tĩrtũm mex o mex ã harēnh  
Juāw 8.12; Epes 5.3-21; Wam Tesarõn 5.5; Eprêw  
4.14-16, 9.11-14*

<sup>5</sup>Nē Jesus kot tanhmã mẽ inhmã Tĩrtũm jarēnh toja kot paj amnhĩ xô ri mẽ amã hã kagà. Nà Tĩrtũm kot amnhĩ nhĩpêxja mex o mex. Aa kot tanhmã amnhĩ tomnuj to hkêt. Mex o mex jakamã na hte tanhmã mẽ kot amnhĩ tomnuj to mã amnhĩ jagjênh kêt. ãm kot amnhĩ to mex o kot amnhĩ to mex rãhã nē pa ho pa xwỳnh na. <sup>6</sup>Kot mẽ pahte

amnhĩ tomnuj kêt ã mẽ pamã karõ jakamã kot puj mẽ pahpê hkra hã amnhĩ jarēnh tã amnhĩ tomnuj pix o ri papa nẽ ãm pahpê hkra hã amnhĩ jarēnh kaprý nẽ amnhĩ to paxêx. Tĩrtũm krajaja na htem amnhĩ tomnuj o pa hkêt nẽ. <sup>7</sup> Nom kot puj mẽ hkôt amnhĩ nhĩpêx nẽ uràk nẽ tãm ri amnhĩ nhĩpêx o papa. Nẽ kapêr kôt ri amnhĩ nhĩpêx. Hãmri nẽ te ixkre tipxi kamã ri Tĩrtũm mẽ Kra Jejus Kris wa hkôt axpên to papa pyràk o amnhĩ nhĩpêx. Na pre Jejus mẽ panê ty nẽ hkamrô axkapĩ. Jao mẽ pahte hkôt amnhĩ xunhwỳr xwỳnhjaja mẽ panê mẽ pahte amnhĩ tomnuj piitã hpãnhã amnhĩrer pa. Jakamã ãm kukwak ri pix mã na pu htem tãm amnhĩ nhĩpêx o ri papa.

*Mẽ pahpiitã mẽ pahte amnhĩ tomnuj xwỳnh ã mẽ pajarēnh*

<sup>8</sup> Nẽ mẽ pahte tōhã tanhmã amnhĩ tomnuj to jakamã kot puj mẽ aa pahte amnhĩ tomnuj kêt ã amnhĩ jarē hãmri nẽ ã amnhĩ jarēnh anhỳr o paxêx. Tĩrtũm kot mẽ pahpiitã mẽ pahte amnhĩ tomnuj ã mẽ pahpumunh xwỳnh kênã.

*Mẽ pahte amnhĩ tomnuj nẽ tanhmã amnhĩ nhĩpêx to hã mẽ pamã karõ*

*Xiakre 4.9-10*

<sup>9</sup> Nẽ mẽ pahpê Tĩrtũm krajaja na pu htem tanhmã amnhĩ tomnuj to hãmri nẽ tee ri ja hã amnhĩ pumu nẽ pahkaprĩ nẽ. Nẽ tokyx amnhĩ to Tĩrtũm wỳ. Hãmri nhũm mẽ pama nẽ Jejus kukwak ri tanhmã hã mẽ pahto hkêt nẽ. ãm amnhĩ katut kôt tanhmã mẽ pahte amnhĩ tomnuj tota rẽ nẽ axte kãm hamaxpêr kêt nẽ. Ra kot mẽ pahtã amnhĩ jarēnh xà hkôt. Na hte Tĩrtũm amnhĩ

jarēnh xà hkôt tanhmã amnhĩ nhĩpêx to. Tã ra kot mẽ pahpê hkrajaja mẽ pahte amnhĩ tomnuj piitã amnhĩ katut kôt rēnh par ã amnhĩ jarēnh jakamã na pre ã mẽ panhĩpêx anē. Na hte mẽmoj tã tanhmã amnhĩ jarēnh to hāmri nhũm apkati nhũm ihkjê ho kumẽ nẽ axtem tanhmã mẽmoj jarēnh to hkêt nẽ. <sup>10</sup> Ra kot mẽ pahpiitã mẽ pahte amnhĩ tomnuj xwýnh ã mẽ pajarēnh jakamã kot puj mẽ pahtõ ã mẽ pajarēnh anhỹrja ma nẽ hkôt pajamaxpêr kêt japêr. Rỳ kuma nẽ ãm kuma nẽ pajamaxpêr o:

—Nà ixte tanhmã amnhĩ tomnuj tore hã.

Anhỹr o amnhĩ jarē. Hāmri nẽ te ate Tĩrtũm hêx xwýnh ã harēnh pyræk. Jao amã kapêr mar prãm kêt ã amnhĩ to amnhĩrĩt.

## 2

*Jejus kêp mẽ paxyr pê Tĩrtũm mã kapêr xwýnh ã harēnh*

*Wam Ximotre 2.5; Eprêw 9.11-14*

<sup>1-2</sup> E mẽ ate amnhĩ tomnuj o apa hkêt kaxyw na pa ã mẽ amã ixkapêr nẽ hã kagà anē. Mẽ ate kamã harēnh nẽ mar hāmri nẽ tanhmã amnhĩ tomnuj to hkêt kaxyw. Jejus Kris na pre mẽ pahpiitã mẽ pahte amnhĩ tomnuj pãnhã amnhĩrer kaxyw mẽ panê ty. Jakamã kot puj mẽ pahpê hkrajaja tanhmã amnhĩ tomnuj to nhũm ja hã mẽ pahpumu nẽ te kêp mẽ paxyr pê Tĩrtũm mã kapêr xwýnh pyræk o amnhĩ nhĩpêx. Mẽ pakurom aa kot amnhĩ tomnuj kêt jakamã na hte mẽ paxyr pê Tĩrtũm mã kapêr nhũm kuma. Hāmri nẽ kukwak ri pix mã mẽ pahte tanhmã amnhĩ tomnuj to piitã

amnhĩ katut kôt rēnh pa nē axte kãm hamaxpēr kêt nē.

*Tĩrtũm krajaja kot Tĩrtũm kôt amnhĩ nhĩpêx ã mẽ kãm karõ*

<sup>3</sup> Nē na pu htem Tĩrtũm kôt ri amnhĩ nhĩpêx o papa hã amnhĩ pumunh kôt pahpê hkra hã amnhĩ pumunh mex nē. <sup>4</sup> Nom koja mēhõ kēp hkra hã amnhĩ jarēnh tã hkôt amnhĩ nhĩpêx kêt nē ãm kēp hkra hã amnhĩ to hêx. <sup>5</sup> Na htem Tĩrtũm kapēr kôt amnhĩ nhĩpêx o pa pē kãm hkĩnh tỳx ã amnhĩ to amnhĩrīt. Nē kēp hkra hã amnhĩ to amnhĩrīt mex o pa. <sup>6</sup> Jakamã kēr ka mẽ apē Jejus Kris kwỳ hã amnhĩ jarēnh xwỳnhjaja hkôt pix mã amnhĩ nhĩpêx mex o ri apa.

*Mẽ pamã axpēn kĩnh ã mẽ pamã karõ  
Juãw 13.34-35; Wam Juãw 3.14-18*

<sup>7</sup> E Kris kôt ixkràmnhwỳjaja. Inhmã mẽ akĩnh jakamã na pa ã mẽ amã mẽmoj jarēnh nē hã kagà anē. Kot paj mẽ amã mẽmoj nyw jarēnh kêt nē. Ra mẽ ate mẽmoj mar xwỳnhhta kot paj axte mẽ amã harē. Mẽ pamã axpēn kĩnh nē tãm axpēn nhĩpêx o papa hã Tĩrtũm kot mẽ pamã karõta. Ra mẽ ate mar tã kot paj axte mẽ amã harē nē hã kagà. <sup>8</sup> Wam Tĩrtũm kot mẽ pamã axpēn kĩnh ã mẽ pamã karõja kormã Jejus kot mẽ panê htyk hkêt ri kot mẽ pamã hã karõta na. Tã ra Jejus kãm mẽ pajapê xàj mẽ panê htyk jakamã na pa axte ã mẽ ate axpēn nhĩpêx anhỳr o apa hã mẽ amã karõ nē hã kagà. Mẽ ate Kris pyrà nē amã axpēn kĩnh xàj tanhmã axpēn kutã anojarêt to ho ri apa kaxyw. Nom kormã mẽ pahte Jejus kôt amnhĩ xunhwỳr kêt ri na pu prem ã axpēn nhĩpêx anhỳr kêt nē. Tã hkôt

amnhĩ xunhwỳ hāmri nē ã axpēn to mex o papa anē. <sup>9-11</sup> Tã koja mēhō kot Jejus kōt amnhĩ nhĩpêx ã amnhĩ jarēnh tã kām hkwyjê hkĩnh kām àmnhĩx ri mē kutã nojarêt o pa hkêt nē. Hāmri nē kot Jejus kōt amnhĩ nhĩpêx ã amnhĩ jarēnh ã amnhĩ to hêx. Jao te htỳx ri kamàt kō kamã pa pyrāk. No koja mēhō kām hkwyjê hkĩnh kām mē kutã nojarêt o pa nē mãnēn Jejus kōt amnhĩ nhĩpêx mex o pa. Jao te hirã kamã ri pa pyrāk. Jakamã tanhmã hkwyjê homnuj to ho pa hkêt nē mē piitã mē ho mex o axpēn pyrāk o pa.

*Juāw kot mē piitã ahpỹnhã tanhmã mē kām kapēr to*

<sup>12-14</sup> E kot pa ahpỹnhã tanhmã mē amã ixkapēr to nē hã kagà. Mē apiitã te mē apê ixkra pyrāk. Na ka prem Jejus kōt amnhĩ xunhwỳ nhũm Tĩrtũm ja hã mē apumu nē Kra kukwak ri mē ate amnhĩ tomnuj piitã amnhĩ katut kōt rēnh pa nē axte kām hamaxpēr kêt nē. Jakamã ra mē ate Tĩrtũm kēp Mēpanhĩpêxà Maati hã omunh mex.

Nē mē ate Jejus kōt amnhĩ xunhwỳr ã amgrà xohô xwỳnhjaja. Amnepēm amrakati ri Jejus ra rãhã ri pa ho pa xwỳnhja kōt mē ate amnhĩ xunhwỳr xwỳnhjaja kot paj mē amã tanhmã ixkapēr to nē hã kagà.

Nē mē akwỳjaja ham Jejus kōt mē ate amnhĩ xunhwỳr xwỳnhjaja ra mē ate Tĩrtũm kapēr mã ajamaxpēr rãhã ho ri apa. Jakamã na hte Satanasti mē ate amnhĩ tomnuj prãm xàj tee ri tanhmã mē akrã hto ka mē Jejus nhỹ hã kutã amnhĩ to htỳx pē hkōt amnhĩ nhĩpêx kêt nē.

*Mě kot amnhĩ tomnuj xwỳnhjaja tanhmã kot amnhĩ nhĩpêx to*

*Matêwre 6.24; Eprêw 11.24-26; Xiakre 4.4*

<sup>15</sup> Ně kêr ka mẽ amã Tĩrtũm kôt amnhĩ nhĩpêx prãm xàj mẽ kot amnhĩ tomnuj xwỳnhjê hkôt amnhĩ nhĩpêx kêt nê. Ně mẽ hamaxpêr punuj xwỳnhjê hkôt ri amnhĩ nhĩpêx kêt nê. Kot kaj mẽ hkôt amnhĩ nhĩpêx hãmri nê amã Tĩrtũm kĩnh kêt ã amnhĩ to amnhĩrĩt. <sup>16</sup> Mě kot amnhĩ tomnuj xwỳnhjaja na htem mẽmoj punuj mã hamaxpêr nê hkôt tanhmã amnhĩ tomnuj to. Ně mẽmoj pumu nê ra kãm ho õ hprãm nom Tĩrtũm pê ja omnuj ã hkamnhĩx kêt nê. Rỳ tanhmã mẽhõ kot amnhĩ tomnuj to hã omu nê hkôt kãm amnhĩ nhĩpêx prãm. Ně tanhmã amnhĩ to jarkrar to ho ri pa. Á na hte mẽ kot amnhĩ tomnuj xwỳnhjaja amnhĩ nhĩpêx anhỹr o pa. Mě kot amnhĩ nhĩpêxja Měpanhĩpêxã Tĩrtũm kãm hprãm kêt. <sup>17</sup> Koja nhỹrmã mẽ kot tanhmã amnhĩ tomnuj toja piitã hapêx pa. Ně mẽ hamaxpêr punujja mããnên nhỹrmã hapêx pa. Ně mẽ kot amnhĩ tomnuj o mẽ pa xwỳnhjaja koja mẽ amnhĩ xà htỳx kamã hamak rãhã ho pa ho pa. No Tĩrtũm kôt mẽ kot amnhĩ nhĩpêx o mẽ pa xwỳnhjaja koja mẽ kurom kuri htĩr tũm nê mex nê hkĩnh nê pa ho pa.

*Kãm Kris kurê xwỳnh maati jarênh*

*Wam Juāw 4.1-6; Sikũn Juāw 7-11*

<sup>18</sup> E Kris kôt ixkwỳjaja. Kris akupỹn mẽ pahwỳr wrỳk kukamã koja mẽmoj tanhmã amnhĩ nhĩpêx to. Na pre ra Kris kôt mẽ panhĩõja mẽ pamã ã harênh anê nê harênh o:

—Koja mẽ panhõ Pahihti Kris akupÿn mẽ pahwÿr wrÿk kaxyw hãmri nhũm kêp Kris ã amnhĩ to hêx xwÿnh maati kumrêx nhÿhÿnh kato. Hãmri nê hêx rom te Kris pyrà nê tanhmã mẽ kãm kapêr to nê tanhmã mẽ hipêx to ho pa nhũm rĩ kormã Kris akupÿn mẽ pahwÿr wrÿ. Anê.

Na pre hkukamã ã harênh anê ka mẽ harênh ma. Tã ra mẽ kêp Kris ã amnhĩ to hêx xwÿnhjaja ohtô nê mra nê kãm hkurê xwÿnh maatita kukamã tanhmã amnhĩ nhĩpêx to pê mẽ kãm amnhĩ to hêx o pa. Jakamã na pa ixprĩ hã mẽ amã tanhmã mẽ harênh to. Koja tokyx kêp Kris ã amnhĩ to hêx xwÿnh maatita nhÿhÿnh mẽ pahwÿr kato. <sup>19</sup> Na pre hkwÿjaja mẽ pahpê Kris kwÿjê hkôt ri pa htã mẽ pahkĩnhã kêp Kris kwÿ hkêt. Kêp hkwÿ ronhÿx arĩ mẽ pahkôt Kris kôt amnhĩ nhĩpêx o pa. Nom axtem nê àhpumunh tÿx pyrà nê mẽ pahkaga nê htÿx tanhmã amnhĩ tomnuj to ho pa. Jao kêp Jejus kwÿ hkêt ã amnhĩ to amnhĩrĩt.

<sup>20</sup> No kêt mẽ pahpê Tĩrtũm krajaja na pre Jejus mẽ pahwÿr Karõ rê nhũm mẽ pahkarõ mã agjê nê mẽ pahkrãm kapêr mex jagjê. Jakamã na pu mẽ mẽ kêp Kris kwÿ hkêt xwÿnhjê rom Tĩrtũm kapêr mar mex nê.

<sup>21</sup> Xà mẽ ate Tĩrtũm kapêr ã kagà pumunh kêt kôt na pa ã mẽ amã ixkapêr nê hã kagà anê? Nà ra mẽ ate omunh nê mar mex kênã. Tã mẽ ate mẽ kot tanhmã Jejus o hêx to xwÿnhjê pumunh mex nê mẽ harênh mar mex kaxyw na pa ã mẽ awÿr kagà nhĩpêx nê mênh anê. Kêr kê mẽ mêmemo arĩgro hã mẽ awÿr agjê nê tanhmã mẽ amã Jejus o hêx to ka mẽ aprĩ hã mẽ omunh mex kurê kumrêx. <sup>22</sup> Tanhmã na htem Jejus o hêx to? E kot paj ixprĩ hã mẽ amã



tanhmã mẽ harēnh to ka mẽ inhma. Nà koja mẽhõ mẽ amã tanhmã harēnh to nẽ harēnh o:

—Nà Jejus kęp Tĩrtũm Kra hkêt. Tĩrtũm kot mẽ pahwỳr mẽnh kêt tã ka htem atỳx kapěr kôt ri amnhĩ nhĩpêx o ri apa. Kwa kêt mẽ ixkapěr kôt mãn ri amnhĩ nhĩpêx o ri apa.

Anhỳr o mẽ amã kapěr ka mẽ ama nẽ kãm Kris mẽ Tĩrtũm wa hkĩnh kêt xwỳnh ã omunh kurê kumrêx. <sup>23</sup> Koja mẽhõ Tĩrtũm Kra Jejus kaga nẽ määnẽn Hipêêxà kaga. No koja mẽhõ Tĩrtũm Kra hkôt amnhĩ xàm nẽ määnẽn Hipêêxà hkôt amnhĩ xãm.

*Mẽ pahte Kris kaga pymaj tanhmã amnhĩ nhĩpêx to hã mẽ pamã karõ*

<sup>24</sup> Amnepêm mẽ ate Jejus kôt amnhĩ xunhwỳrta ã na ka prem kęp Tĩrtũm Kra hã Tĩrtũm kot mẽ pahwỳr mẽnh xwỳnh ã harēnh ma. Tã kêt ka mẽ arĩ amnhĩ kaxyw hkôt ajamaxpěr nẽ hkôt pix mã amnhĩ nhĩpêx o ri apa. Kot kaj mẽ anẽ nẽ Měpanhĩpêêxà Maati mẽ Kra wa hkôt amnhĩ nhĩpêx mex o apa rãhã ty. <sup>25</sup> Hãmri nẽ wa kuri atĩr tũm nẽ amex kumrêx nẽ apa ho apa. Ra Jejus kot ja jarēnh xà hkôt.

<sup>26</sup> Na pa ã mẽ amã ixkapěr nẽ hã kagà anẽ. Mẽ aprĩ hã mẽ amã Jejus o hêx xwỳnhjê kapěr mar nẽ mẽ kot mẽ amã hêx kôt mẽ omunh mex kaxyw. <sup>27</sup> Tĩrtũm Karõ na pre mẽ akarõ mã gjêx pa nẽ mẽ amã Tĩrtũm kapěr piitã o amnhĩrĩt mex o mẽ akôt pa. Jakamã mẽmo kaxyw kot kaj mẽ Tĩrtũm kapěr o hêx xwỳnhjaja kot tanhmã harēnh toja ma? Ra Tĩrtũm Karõ kot mẽ amã ho amnhĩrĩt o mẽ ajahkre mex o pa kẽnã kot ka kêt mẽ nhãm mẽ kapěr ma.

Na hte Tirtūm Karōja mẽ urà nẽ Tirtūm kapēr ho hêx kêt nẽ. Ām katàt kôt kot ho amnhĩrīt mex jakamā kwa kër ka mẽ mar tỳx nẽ hkôt ri amnhĩ nhĩpêx mex rāhā ho ri apa.

*Mẽ pahte tām ri amnhĩ nhĩpêx ã mẽ pamã karō  
Juāw 14.25-26, 15.1-8*

<sup>28</sup> E Jejus kôt ixkrajaja. Kër ka mẽ arĩ Kris kôt amnhĩ nhĩpêx mex rāhā ho ri apa. Kê nhỹrmã akupỹn mẽ pahwỳr wrỳk o tẽ ka mẽ amnhĩ wỳr omu nẽ akĩnh nẽ. Nẽ akĩnh kām axàmnhĩx kutã mra nẽ hkaxpa nẽ amnhĩ kamã amã uma hkêt nẽ. Rỳ mẽmoj tã amnhĩ tã apijaam kêt nẽ. Ām axàmnhĩx akĩnh nẽ ma kutã mra. <sup>29</sup> Krisja mex o mex jakamā na pu htem uràk nẽ amnhĩ to mex o ri papa. Mẽ pahte amnhĩ to mex o papa xwỳnhjaja uràk nẽ mẽ pahpê Tirtūm kra na pu mẽ.

### 3

*Tirtūm krajé hkukamā tanhmã mẽ harēnh to  
Rômān 8.18; Sikūn Korīt 3.18; Sikūn Pêtre 3.11-14*

<sup>1</sup> Nẽ Mẽpanhĩpêêxà Maati kām mẽ pajapê htỳx kumrêx jakamā na pre mẽ pahte hkôt amnhĩ xunhwỳr ã mẽ pahpumunh kôt mẽ pahpê hkra hã mẽ pajarē pu mẽ pahpê hkra nẽ ri papa. Ja na mẽ pamã mex o mex. Nom mẽ kot hkôt amnhĩ xunhwỳr kêt xwỳnhjaja kot hprĩ hã ja hã mẽ pahpumunh kêt jakamā na htem mẽ pahte tām amnhĩ nhĩpêx ã mẽ pahpumu nẽ tee ri hamaxpēr.

<sup>2</sup> E Kris kôt ixkwỳjaja. Ra mẽ pahpê Tirtūm kra htã kormã mẽ pahte amnhĩ kukamā mẽ pahprĩ hã ja hã amnhĩ pumunh mex kêt. Koja nhỹrmã Jejus akupỹn mẽ pahwỳr wrỳ pu mẽ pano ho tanhmã

kute hã omunh mex nẽ. Hãmri nẽ tã te kot amnhĩ nhĩpêx pyrãk o amnhĩ nhĩpêx mex o papa. Ra mẽ pahte ja mar mex. <sup>3</sup> ã mẽ pahte amnhĩ kukamã pajamaxpêr anhÿr o papa xwÿnhjaja na pu htem kormã amnhĩ wÿr Jejus kamã pajamak o papa. Pê urãk nẽ mẽmoj punuj mã pajamaxpêr kêt o papa. Nẽ urãk nẽ tanhmã amnhĩ tomnuj to hkêt nẽ.

*Tĩrtũm krajaja kot amnhĩ tomnuj o pa hkêt ã mẽ kãm karõ*

<sup>4</sup> Nẽ mẽ kot amnhĩ tomnuj o mẽ pa xwÿnhjaja na htem Tĩrtũm kapêr kwÿm ri amnhĩ nhĩpêx o pa. Tã kot puj mẽ tanhmã amnhĩ tomnuj to hãmri nẽ mẽ urãk nẽ kapêr kwÿm ri amnhĩ nhĩpêx. <sup>5</sup> No Jejus na pre mẽ pahte amnhĩ tomnuj pãnhã amnhĩrer kaxyw mẽ pahwÿr wrÿ. Aa kot amnhĩ tomnuj kêt jakamã tapxipix kot mẽ pahpãnhã amnhĩrer mã tãm. Ra mẽ pahte ja jarênh mar mex. <sup>6</sup> Jakamã mẽ pahpê hkwÿjaja na pu htem ri pahtÿx tanhmã amnhĩ tomnuj to ho papa hkêt nẽ. Á mẽ kot amnhĩ nhĩpêx anhÿr xwÿnhjaja kêp hkwy hkêt. <sup>7</sup> Nom koja mẽhõ Kris pyrã nẽ tãm amnhĩ nhĩpêx o pa hãmri nẽ kêp Tĩrtũm kraa. Jakamã kwa koja mẽhõ Tĩrtũm kapêr kwÿm ri tanhmã mẽ amã kapêr to ka mẽ ama nẽ ãm ama. <sup>8</sup> Mẽ kot amnhĩ tomnuj o mẽ pa xwÿnhjaja na htem Satanasti hkõt ã amnhĩ nhĩpêx anhÿr o pa. Satanastija Tĩrtũm kot mẽmoj to kator krax rũm nhũm ã kot amnhĩ tomnuj anhÿr o pa xwÿnh na. Tã ã kot amnhĩ nhĩpêx anhÿr o paja o hapêx par kaxyw na pre Tĩrtũm Kra Jejusja amnẽ pika hwÿr wrÿ.

<sup>9</sup> Nom mẽ papajaja mẽ pahpê Tĩrtũm kra na pu mẽ. Na pre mẽ pahwÿr amnhĩ Karõ rẽ nhũm

mē pahkarō mā gjêx pa nē mē pahkôt pa ho pa. Jakamā tanhmā kot puj wem amnhĩ to nē Satanasti pyrà nē pahtỳx ri amnhĩ tomnuj o papa? Nà kot puj mē ā amnhĩ nhĩpêx anhỳr kêt nē. <sup>10</sup> Koja mēhō tām amnhĩ nhĩpêx kêt nē hāmri nē määnēn hkwyjê kamā ukapří hkêt nē. Hāmri nē ā amnhĩ nhĩpêx anhỳr o kêp Tirtũm kra hkêt ā amnhĩ to amnhĩrīt. Ām kêp Satanasti hkra hā amnhĩ to amnhĩrīt kurê kumrêx.

*Mē pamā axpēn kīnh o te Jejus kām mē pahkīnh pyrāk ā mē pamā karō*

*Matêwre 22.39; Rukre 10.25-37; Juāw 13.31-35*

<sup>11</sup> Nē kêt ka mē arĩ amā axpēn kīnh pê tām axpēn nhĩpêx o ri apa rāhā nē. Te amnepê mā mē ate Jejus kôt amnhĩ xunhwỳr ā arĩgrota ā mē kot mē amā ja hā karō pyrà nē. <sup>12</sup> No mē ri finat Kaĩ kot amnhĩ nhĩpêx pyrāk o amnhĩ nhĩpêx kêt nē. Kêp Satanasti hkra jakamā na pre htōja pĩ. Kurom kot tām amnhĩ nhĩpêx ā omu nē kamā gryk nē kupĩ. <sup>13</sup> Tā koja mē kêp Tirtũm kra hkêt xwỳnhjaja Kaĩ pyrà nē kêp mē aprām nōkati nom kêt ka mē amnhĩ tā mē omu nē tee ri amnhĩ kukamā ajamaxpēr kêt nē. <sup>14</sup> Kormā mē pahte Jejus kôt amnhĩ xunhwỳr kêt ri na pu prem mē urāk nē amnhĩ tomnuj o papa. Jao mē pahpê kuwy hwỳr papa mā xwỳnh. Tā mē pahte Jejus kôt amnhĩ xunhwỳr jakamā ra pahpê Tirtũm mē Kra wa kuri pahtĩr tũm nē papa mā xwỳnh. Jakamā na pu htem mē kêp hkra hkêt xwỳnhjê kurom pamā mē piitā mē hkīnh o tanhmā mē ho mex to ho papa. Mē kām amnhĩ kwỳjê hkīnh kêt xwỳnhjaja arĩ mē kêp kuwy hwỳr mē pa mā xwỳnh na mē. Ra mē pahte ja jarēnh mar mex. <sup>15</sup> Mē

kām mẽ hpar prām o mẽ pa xwỳnhjaja koja nhỹrmã Tĩrtũm mẽ Kra wa kuri htĩr tũm nẽ pa ho pa hkêt nẽ. Ra mẽ pahte mãnnẽn ja mar mex. Jakamã kwa mẽ amã akwỳjẽ hprãm nõkati ho ri mẽ apa xwỳnhjaja. Tĩrtũm noo mã te ra mẽ ate mẽ hpar pyræk jakamã kot kaj mẽ arĩ ã amnhĩ nhĩpêx anhỹr o ri apa hãmri nẽ nhỹrmã Tĩrtũm nhõ krĩ hwỳr axàpir kêt nẽ.

16-18 E ixkwỳjaja. Kwa kêt pu mẽ pajakwa pix o pamã axpẽn kĩnh ã amnhĩ jarẽn kêt nẽ. Mãnnẽn axpẽn kutã panojarêt o ri papa. Nẽ tanhmã axpẽn to mex to. Tanhmã na pre Jejus kãm mẽ pajapê hã amnhĩ nhĩpêx to? Nà na pre kãm mẽ pamex prãm xàj mẽ panê ty. Kãm amnhĩ tã ma hkêt kãm mẽ pakamã ukaprĩ xàj mẽ panê ty. Tã kêt pu mẽ uræk nẽ pahkwỳjẽ kamã paxukaprĩ ho mẽ kutã panojarêt rãhã ho papa. Jao mẽ paxàpkur xà hã panhõ pumu nẽ nhỹri pahkwỳjẽ hõ pumu nhũm kệp amrakati. Pu mẽ tee ri ja hã omu hãmri nẽ kãm mẽ panhõta kwỳ gõ. Kot pu mẽ ã amnhĩ nhĩpêx anhỹr kêt nẽ hãmri nẽ pamã Tĩrtũm kĩnh ã amnhĩ jarẽn kaprỳ. <sup>19</sup> Nẽ kot puj mẽ ã axpẽn to mex o papa anẽ nẽ ra pahte Tĩrtũm kôt amnhĩ nhĩpêx mex ã amnhĩ to amnhĩrĩt. Hãmri nẽ ra paxàmnhĩx kãm tanhmã amnhĩ jarẽn to ho papa. Amnhĩ kamã pamã uma hkêt nẽ paxàmnhĩx pajamakêtcati nẽ kãm tanhmã amnhĩ jarẽn to.

*Mẽ paxàmnhĩx amnhĩ to Tĩrtũm wỳr ã mẽ pamã karõ*

<sup>20</sup> Nẽ kot puj mẽ mẽmo arĩgro hã tanhmã amnhĩ tomnuj to hãmri nẽ tee ri ja hã amnhĩ pumu nẽ amnhĩ kamã pagryk nẽ. Na hte Tĩrtũm tanhmã mẽ pahte amnhĩ tomnuj to hã mẽ pahpumu nom arĩ

kãm mẽ pajapêê. Mẽ parom àhpumunh o àhpumunh jakamã kot mẽ pahte amnhĩ tomnuj prãm kêt ã mẽ pahpumunh mex. <sup>21</sup> Jakamã puj mẽ ã kãm pajamaxpêr anê nê amnhĩ kamã pamã uma hkêt kãm paxàmnhĩx tanhmã ri amnhĩ to hwÿr to ho ri papa. <sup>22</sup> Kot puj mẽ hkôt amnhĩ nhĩpêx o papa rãhã nê mẽmoj tã kuwÿ. Nê kãm hprãm xà hkôt amnhĩ nhĩpêx o papa hã amnhĩ pumunh kôt mẽmoj tã kuwÿ. Hãmri nhũm mẽ pama nê tanhmã mẽ pamã mẽmoj to rÿ mẽ pamã mẽmoj gõ.

*Te ixkre pixi kamã mẽ pahtipxi pyræk ã mẽ pamã karõ*

<sup>23</sup> Nê tanhmã mẽ pahte amnhĩ nhĩpêx to ho papa hã na hte Tĩrtũm mẽ pamã karõ? Nà mẽ pahte amnhĩ kaxyw Kra Jejus Kris kôt pajamaxpêr nê hkôt amnhĩ nhĩpêx o papa hã na hte mẽ pamã karõ. Nê kapêr xà hkôt pamã axpên kĩnh o mẽmoj to axpên kutã panojarêt o papa hã na hte mẽ pamã karõ. Na hte ã mẽ pahte amnhĩ nhĩpêx anhÿr ã mẽ pamã karõ anê. <sup>24</sup> Jakamã kot puj mẽ kapêr xà hkôt axpên nhĩpêx o papa nê te ixkre tipxi kamã mẽ pahte axpên kôt Tĩrtũm kôt ri papa pyræk. Ra kot mẽ pahwÿr Karõ rēnh nhũm kot mẽ pahkarõ mã gjêx jakamã na hte mẽ pahkôt pa ho pa hã amnhĩ to amnhĩrīt.

## 4

*Mẽ kot Kris kapêr jarēnh ã amnhĩ to hêx xwÿnhjê jarēnh*

*Wam Korīt 12.1-3; Wam Juãw 2.18-26; Sikũn Juãw 7-11*

1-3 Nê koja mēhō Tirtūm kapēr o mē ajahkre kaxyw mē amã tanhmã Jejus Kris jarēnh to nē ãm hāmri harē nē harēnh o:

—Na pre Tirtūm Kra Jejus mē pahwÿr wrÿ nē ĩ ho ĩ ho mē pakamã kato. Tirtūm tãm na pre mē pahwÿr kumē nhūm wrÿ.

Anhÿr o mē amã harē ka mē ama nē kapēr kôt ajamaxpēr kurê kumrēx. ãm hāmri na hte Tirtūm Karō nhÿ ã harēnh anē. No koja Jejus kēp Tirtūm Kra hkêt ã harē ka mē ama nē ãm ama nē hkôt ajamaxpēr kêt nē. Kãm Kris kurê xwÿnh maati nhÿ hã kapēr xwÿnhjaja na hte ã harēnh anhÿr o pa. Na ka prem ra kãm Kris kurê xwÿnh maatija tokyx hpôx ã harēnh ma. Tã na ra ŷ hã kapēr xwÿnhjaja ohtô nē pika piitã hkôt mē hkôt pa nē te Tirtūm Karō nhÿ hã mē kãm kapēr pyrãk o amnhĩ nhĩpêx o pa. Nom ãm amnhĩ to hêx o pa. Jakamã e kwa ixkwÿjaja. Koja mēhō mē awÿr mra nē tanhmã mē amã Tirtūm kapēr jarēnh to ka mē aprĩ hã ama nē rĩ kormã kēp Tirtūm nhÿ hã kapēr jarēnh xwÿnh ã harē rÿ kot amnhĩ to hêx xwÿnh ã harē.

<sup>4</sup> Kêt mē papajaja jajê rom mē pahpê Tirtūm kra na pu mē. Nê Tirtūm Karō kot ra mē pahkarō mã gjêx xwÿnhhta hihtÿx o jajê piitã mē hakrenh. Jakamã na pu htem ŷ hã mē kutã amnhĩ to htÿx o papa nhūm mē tee ri tanhmã mē pamã Jejus o hêx to kaprÿ. Pu mē kuma nē ãm mē kuma. <sup>5</sup> Mē kēp Tirtūm kra hkêt jakamã na htem hkôt amnhĩ nhĩpêx kêt nē. Mē kot amnhĩ nhĩpêxja axtem na. Jakamã na htem Tirtūm kapēr kwÿm ri tanhmã hkra hkêt xwÿnhjê mã kapēr to ho pa nhūm mē kuma nē kãm mē mar prãm nē. <sup>6</sup> Nom mē ixte Tirtūm kapēr o mē ajahkre xwÿnhjaja na pa htem

mě kurom Tĩrtũm nhỹ hã ixkatàt kôat ãm hãmri mẽ amã kapěr jarēnh o ri ixpa. Jakamã ka mẽ apê hkra hã mẽ amã mẽ inhmar prãm nẽ. No mẽ kęp hkra hkêt xwỳnhjaja kãm mẽ inhmar prãm kêt.

Na pu htem pahprĩ hã mẽ kapěr ã mẽ kuma nẽ rĩ kormã tanhmã mẽ harēnh to. Tĩrtũm nhỹ hã kapěr ã mẽ harē rỳ kãm hkurê xwỳnh maati nhỹ hã kapěr ã mẽ harē.

*Tĩrtũm kãm mẽ pajapê hã tanhmã amnhĩ nhĩpêx to hã harēnh*

*Juāw 3.16-21; Rômãn 5.5-9, 8.35-37*

<sup>7</sup> E ixkwỳjaja. Na hte Tĩrtũm tanhmã mẽ pahpê hkrajê ho pu mẽ pamã axpẽn kĩnh nẽ. Jakamã kêr pu mẽ ã axpẽn nhĩpêx anhỹr jao axpẽn to mex pix nẽ. ã Tĩrtũm kot mẽ panhĩpêx anhỹr jakamã kêr pu mẽ pahpê hkrajaja ý hã ã axpẽn nhĩpêx anhỹr o ri papa.

<sup>8</sup> Kojã mēhõ Tĩrtũm kĩnhã kãm mẽ hkwỳjê hkĩnh kêt hãmri nẽ mẽ kamã ukaprĩ hkêt o pa. Hãmri nẽ kęp Tĩrtũm kra hkêt ã amnhĩ to amnhĩrĩt mex nẽ.

<sup>9-10</sup> Tĩrtũm kãm mẽ pajapê htỳx kumrêx. Kormã mẽ pamã hkĩnh kêt ri nhũm kumrêx amnhĩ rom kãm mẽ pajapê ho pa. Nẽ kãm mẽ pajapê xàj mẽ pahwỳr Kra pyxita mẽ. Mẽ pahte amnhĩ tomnuj pãnhã kot mẽ panê htyk kaxyw. Mẽ pahte kukwak ri amnhĩ nhĩpêx nyw o amnhĩ nhĩpêx nẽ nhỹrmã wa kuri pahtĩr tũm nẽ pamex nẽ papa ho papa kaxyw. ã na pre Tĩrtũm mẽ pahwỳr Kra mēnh anhỹr o kãm mẽ pajapê hã amnhĩ to amnhĩrĩt.

<sup>11</sup> E ixkwỳjaja. Tĩrtũm kãm mẽ pajapê htỳx jakamã kwa kêr pu mẽ uràk nẽ pamã axpẽn kĩnh o papa. Nẽ axpẽn kamã paxukaprĩ nẽ. <sup>12</sup> Aa mẽ



pahtō pahte pano ho Tirtūm pumunh kêt tâ na hte mẽ pakamã pa ho pa. Pu mẽ kãm mẽ pajapêta pyrã nê ý hã pamã axpẽn kĩnh o papa. <sup>13</sup> Na pre mẽ pahwỳr Karō rê nhũm mẽ pahkarō mã agjê pu mẽ ý hã kot amnhĩ nhĩpêx o amnhĩ nhĩpêx o papa.

<sup>14</sup> Nê mẽ ixpê Jejus nhỹ hã mẽ ajahkre xwỳnhjaja. Mẽ ixte kot amnhĩ nhĩpêx nê kot mẽmoj tanhmã ho hã omunh o ri hkôt ixpa jakamã na pa htem ma mẽ piitã mẽ kãm harênh o ri mẽ hkôt ixpa. Nê mẽ kãm harênh o:

—Tirtūm na pre mẽ pahwỳr Kraja mẽ. Kot mẽ pahpiitã mẽ panê htyk kaxyw mẽ pahwỳr kumẽ. Anê.

<sup>15</sup> Mẽ kot Jejus kêp Tirtūm Kra hã harênh o pa xwỳnhjaja na hte Tirtūm mẽ kamã pa ho pa nhũm htem ý hã ã Kra jarênh anhỹr o pa.

<sup>16</sup> Na pu mẽ ra pahprĩ hã Tirtūm kãm mẽ pajapê hã amnhĩ tâ omu. Kãm mẽ pajapê htỳx kumrêx ã amnhĩ tâ omu. Jakamã kot puj mẽ urak nê ý hã pamã mẽ piitã mẽ hkĩnh o papa. Tirtūm mẽ mẽ pahtipxi nê ri papa kênã.

*Mẽ kãm axpẽn kĩnh xwỳnhjaja kãm Tirtūm puma hkêt ã mẽ harênh*

<sup>17</sup> Nê kot puj mẽ pamã axpẽn kĩnh o papa nê mãânên Kris kôt amnhĩ nhĩpêx ho papa. Hãmri nhũm nhỹrmã Tirtūm kot Kra mẽ wa kuri mẽ htĩr tũm nê mẽ pa ho mẽ pa mã xwỳnhjê nhĩxi jarênh kaxyw pu mẽ tee ri amnhĩ kukamã pajamaxpêr kêt nê. Ra amnhĩ nhĩxi jarênh ma nê pahkĩnh nê.

<sup>18</sup> Nê koja mēhō kãm hkwyjê hkĩnh kêt nê tanhmã hō homnuj to. Hãmri nê kot amnhĩ tâ tanhmã ho pymaj kãm uma ho hwỳr mrar kêt nê. No koja kãm hkwyjê hkĩnh nê tanhmã mẽ ho mex

to ho pa nē kām mẽ uma hkêt nē. <sup>19</sup> Tĩrtũm kumrẽx na pre kām mẽ pajapê nē mẽ pakukamã tanhmã mẽ pahto mex to. Tã pu mẽ ra amnhĩ pyrã nē pamã hkĩnh o papa. Nē pamã mẽ piitã mẽ hkĩnh o papa.

<sup>20</sup> Nē koja mēhõ kām Tĩrtũm kĩnh ã amnhĩ jarēnh tã kām hkwyjê hõ hprãm nõkati hãmri nē ra kām Tĩrtũm prãm kêt ã amnhĩ to amnhĩrĩt. Kot kaj mẽ ano ho akwyjê pumunh o apa xwýnhhta amã hkĩnh kêê tã tanhmã kot ka we amnhĩ to nē ate ano ho Tĩrtũm pumunh kêêta amã hkĩnh ã amnhĩ jarê? Nã ka ã amnhĩ jarēnh anhÿr o amnhĩ to axêx. <sup>21</sup> Na pre Tĩrtũm mẽ pamã kapēr o amnhĩrĩt o:

Kot kaj mẽ amã ixkĩnh hã kot kaj mẽ määnēn amã akwyjê hkĩnh o mẽ ho mex o ri apa. Anē.

## 5

*Tĩrtũm nhÿ hã mẽ pamã axpēn kĩnh ã mẽ pamã karõ*

<sup>1</sup> Nē Tĩrtũm kot mẽ pahwÿr Jejus mēnh ã harēnhja. Koja mēhõ kuma nē amnhĩ kaxyw hkôt hamaxpēr nē Jejus kôt amnhĩ xãm hã koja Tĩrtũm ja hã omu nē ho hkra.

Nē koja mēhõ kām Tĩrtũm kĩnh hã koja määnēn kām hkwyjê hkĩnh o pa. <sup>2</sup> Ja pyrã nē kot puj mẽ pamã Tĩrtũm kĩnh nē kapēr kôt amnhĩ nhĩpêx. Hãmri nē määnēn pamã krajê piitã mẽ hkĩnh ho papa.

<sup>3</sup> Nē kot puj mẽ pamã Tĩrtũm kĩnh nē nhũm kapērja mẽ pahpê hihtÿx kêt nē. Pu mẽ pamã Tĩrtũm kĩnh ã kapēr kôt amnhĩ nhĩpêx mex o ri papa.

<sup>4-5</sup> Na pu prem amnhĩ kaxyw Tĩrtũm Kra Jejus kôt pajamaxpēr nē hkôt amnhĩ xunhwÿ nhũm

Tĩrtũm ja hã mẽ pahpumu nẽ mẽ pahto hkra pu mẽ  
ỹ hã amnhĩ nhĩpêx nyw o amnhĩ nhĩpêx o papa. No  
ri tanhmã amnhĩ tomnuj to ho ri papa hkêt nẽ.

*Mẽmoj axkrunêpxi nẽ kot Jejus kêp Tĩrtũm Kra hã  
ho amnhĩrĩt*

*Juāw 1.32-34, 3.36, 5.31, 15.26*

<sup>6</sup> Nẽ Jejus pix na pre Tĩrtũm mẽ pakaxyw âm  
nhũm kêp Kra hã mẽ pahwỳr wrỳ. Hãmri nhũm  
Juāw Paxisja pyhti kamã hkrã kumrã. Kêp Tĩrtũm  
Kra hã hkrã kumrã. Tã nhũm Tĩrtũm kapêr kôt  
ma tanhmã amnhĩ nhĩpêx to ho pa. Nẽ ri hkwyjê  
mã kapêr jarênh o ri mẽ hkôt pa. Tã nhũm mẽ  
kupĩ nhũm kêp Tĩrtũm Kra hã pĩ kahpa hã ajêt nẽ  
ty nẽ hkamrô axkapĩ. ã mẽ panê amnhĩ nhĩpêx  
anê nhũm Tĩrtũm Karõja kêp Kra hã mẽ pamã ho  
amnhĩrĩt. Âm hãmri na hte ã tanhmã mẽmoj to  
amnhĩrĩt to anê. Mẽmoj to hêx kêt jakamã na pre  
Jejus kêp Tĩrtũm Kra hã mẽ pamã ho amnhĩrĩt.

<sup>7</sup> Nẽ kêp Tĩrtũm Kra hã mẽ pamã mẽmoj to  
axkrunêpxi nẽ ho amnhĩrĩt. <sup>8</sup> Tĩrtũm Karõ na pre  
kêp Kra hã mẽ pamã ho amnhĩrĩt pu prem kêp Kra  
hã omu. Nẽ Juāw Paxis kot hkrã kumrãrta ã pu  
mẽ mãănên kêp Tĩrtũm Kra hã kot ho amnhĩrĩtja  
ã omu. Nẽ mãănên kêp Tĩrtũm Kra hã pĩ kahpa  
hã jêt nẽ htyk nẽ hkamrô pikapĩrta ã mẽ pamã  
ho amnhĩrĩt pu mẽ kêp Kra hã omu. E mẽ pamã  
mẽmoj to axkrunêpxi nẽ Jejus kêp Tĩrtũm Kra hã kot  
ho amnhĩrĩt xwỳnh na jajaja.

<sup>9</sup> Nẽ na pu htem jar pahkwỳjaja kot axpên mar  
xà hã ixkre kamã mẽ kapêr ma nẽ mẽ hkôt paja-  
maxpêr. Tã koja Tĩrtũm tanhmã mẽ pamã mẽmoj to  
amnhĩrĩt to pu mẽ hkôt pajamaxpêr kurê kumrêx.

Kêp Tĩrtũm kênã kot pu kêt mẽ kapêr prã nê hkôt pajamaxpêr kêt. Tãm na pre mẽ pamã Jejus kêp Kra hã ã ho amnhĩrit anê. <sup>10</sup> Jakamã mẽ pahte Tĩrtũm Kra hkôt amnhĩ xunhwỳr xwỳnhjaja na pu prem Jejus kêp Kra hã harênh ma nê hkôt pajamaxpêr kurê kumrêx. No mẽ kêp hkra hkêt xwỳnhjaja na htem Tĩrtũm kot kêp Kra hã harênh ma nê ãm kuma nê amnhĩ kaxyw hkôt hamaxpêr kêt nê. Jao te Tĩrtũm kêp Hipêêxà hã amnhĩ to hêx pyrak ã harê.

<sup>11</sup> E kot paj ixprĩ hã mẽ amã tanhmã ja jarênh to ka mẽ inhma. Nà na pre Tĩrtũm Krata mẽ pahpiitã panê ty. Jakamã kot puj mẽ pahte hkôt amnhĩ xunhwỳr xwỳnhjaja nhỹrmã ty nhũm Tĩrtũm akupỹm mẽ pahto mẽ pahtĩr. Pu mẽ wa kuri pamex nê pahtĩr tũm nê papa ho papa. <sup>12</sup> Mẽ pahpê Jejus kwỳjaja kot puj mẽ ã pahtĩr tũm nê papa anê. No mẽ kêp hkwȳ hkêt xwỳnhjaja koja mẽ nhỹrmã ty nê mẽ pahpyrà nê wa hwỳr àpir kêt nê.

<sup>13</sup> Na ka prem ixpyrà nê amnhĩ kaxyw Tĩrtũm Kra hkôt ajamaxpêr nê hkôt amnhĩ xunhwỳ. Tã pa ã mẽ amã kagàja nhĩpêx anê. Mẽ ate kamã harênh nê mẽ pahte nhỹrmã Tĩrtũm mẽ Kra wa hwỳr mẽ paxàpir ã mẽ pajarênhja mar nê amnhĩ kaxyw hkôt ajamaxpêr o ri apa kaxyw nê kapêr prãr o ri apa hkêt nê.

*Mẽ pahte paxàmnhĩx mẽmoj tã Tĩrtũm wỳr ã mẽ pajarênh*

*Juãw 14.13-14*

<sup>14</sup> Nê mẽ pahpê Tĩrtũm krajaja na pu htem paxàmnhĩx pajamakêtkati nê mẽmoj tã tanhmã hwỳr to ho papa. Kot puj mẽ kãm hprãm xà hkôt

mēmoj tã kuwỳ nhũm mē pama. <sup>15</sup> Na pu htem mēmoj tã kuwỳ nhũm mē pamar mex nē mē pahte mēmoj tã hwỳr xà hkôt tanhmã mē pamã mēmoj nhõr to rỳ tanhmã mēmoj to. Ra mē pahte ja mar mex.

*Tĩrtũm kot tanhmã hkra hkêt xwỳnhjê nhĩpêx to hã harēnh*

*Rukre 22.31-32*

<sup>16-17</sup> Nē koja Kris kôt mē anhiõ tanhmã amnhĩ tomnuj to ka mē atõ tee ri ja hã omu nē ho Tĩrtũm wỳ. Ho awỳ kê nē tanhmã kot amnhĩ tomnuj tota o hapêx nē ja nē ho htỳx kê axte ã amnhĩ nhĩpêx anhỹr kêt nē. Kot puj mē pahtõ tanhmã amnhĩ tomnuj to nhũm Tĩrtũm tee ri ja hã mē pahpumu nhũm ja kêp omnuj nē. Tã kot puj mē amnhĩ tomnujta kaga nhũm ja hã mē pahpumunh kôt tanhmã hã mē pahto hkêt nē. Âm mē kot amnhĩ nhĩpêx pixi koja ho hamakêtkati hkêt nē. Koja mēhõ Tĩrtũm kaga ho hkaga nē aa hkôt amnhĩ xãm kêt nē. Hãmri nhũm tee ri amnhĩ tã omu nhũm ja kêp omnuj tỳx kumrêx. Jakamã koja aa ho hkra hkêt nē. Nē aa kot hkaga ho hamakêtkati hkêt nē pa ho pa. Jakamã koja hkaga xwỳnhhta nhỹrmã ty nē kuri htĩr tũm nē pa ho pa hkêt nē.

<sup>18</sup> Nē mē pahpê Tĩrtũm krajaja na pu htem amnhĩ tomnuj o papa hkêt nē. Tĩrtũm Kra Jejus kot ja pymaj mē panê Satanasti pumunh mex jakamã nhũm tee ri mē pahte tanhmã amnhĩ tomnuj to hprãm xàj mē pano kupyrr kaprỳ ho ri pa. Ra mē pahte ja mar mex. <sup>19</sup> Mē pahpê Tĩrtũm kra na pu mē. No mē kêp hkra hkêt xwỳnhjaja Satanasti kot amnhĩ tã mē ho htỳx pyrək o mē hipêx jakamã

nhũm htem tanhmã amnhĩ tomnuj to ho pa. Mẽ pahte ja mar mex.

<sup>20</sup> Nẽ mãănēn ja mẽ pahte mar mex. Na pre Tĩrtũm Kra mẽ pahwỳr wrỳ nẽ mẽ pamã tanhmã Tĩrtũm o amnhĩrĩt to ho pa. Tapxipix kêp Mẽpahpãm ã mẽ pamã ho amnhĩrĩt. Tã Jejus kukwak ri mẽ pahpê Tĩrtũm kra jakamã kot puj mẽ nhỹrmã wa kuri pahtĩr tũm nẽ pa mex nẽ papa ho papa.

<sup>21</sup> E Kris kôt ixkwỳjaja. Kêr ka mẽ Tĩrtũm kapêr kôt pix mã mãn ri amnhĩ nhĩpêx o ri apa rãhã nẽ. No nhãm mẽ kot Tĩrtũm kapêr kwỳm ri mẽ amã kapêr o hêx xwỳnhjê kapêr ma nẽ ãm mẽ ama nẽ mẽ hkôt amnhĩ nhĩpêx hkêt nẽ.

Tã ãm ja pix. Ixpê Juāw na pa krĩ piitã hkôt mẽ amã kagà nhĩpêx nẽ kurê.

**Tĩrtũm kapēr ã kagà nyw**  
**New Testament in Apinayé (BR:apn:Apinayé)**

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

**Copyright Information**

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 11 Nov 2022 from source files  
dated 29 Jan 2022

383a4e22-34cd-505f-9cc2-2f9921e7aa9f